

Date – 31/10/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- 1. National Unity Day (Rashtriya Ekta Diwas) pualin tukin khan Aizawl, Lunglei leh Thenzawlah Unity Run neih a ni.**
- 2. MZP hruaitute'n Inner Line Permit (ILP) dan siamthat tur chungchangah Home Minister hnenah rawtna an thlen.**
- 3. Prime Minister Narendra Modia chuan nizan khan Gujarat-a Ekta nagar atangin hmasawinna hna cheng vaibelchhe 1140 chuang hu a hawng.**
- 4. Vawiinah Prime Minister Narendra Modia hovin Rashtirya Ekta Diwas,National Unity Day pualin Kevadiyah hun hman a ni dawn**

<><><>

UNITY RUN

National Unity Day (Rashtriya Ekta Diwas) pualin tukin dar 6 leh min 15 khan Aizawlah Unity Run neih a ni a, tum ber chu mipuite hnena inpumkhatna leh taksa sawizawi chawilar a ni a tih SAI Director Pu Lianminthang chuan a sawi.

Akashvani News Aizawl zawhna chhangin, Sports Authority of India (SAI) Director Pu Lianminthang chuan Aizawl bakah hian Lunglei leh Thenzawlah te tukin hian insawizawiin an tlan tih a sawi a, mi 400 vel an kal a ni a ti.

<><><>

KOLASIB

Assembly Dy Speaker Pu Lalfamkima ho in Mizoram PWD enkawl Kolasib District chhunga Kawngpui leh Kolasib khaw chhunga Kawngpui te tun thal chhunga siam that dan tur sawiho nimin khan Kolasib DC Conference Hall ah neih ani.

He hunah hian Dy Speaker Pu Lalfamkima chuan, thal chhung hian District chhunga Kawngpui te leh Kolasib khaw chhung Kawngpui te a theih ang ang siam that a pawimawh tih sawi in, heng Kawngpui enkawltu PWD hotute chu hmalak dan tur ruahmanna an neih dan te zawtin a sawipui.

He hunah hian PWD National Highway Division - III EE Pu R. Lalduhthlanga chuan an enkawl chin Highway leh khaw chhung inkawlpawhna thenkhat siamtha tura ruahmanna an kalpui dan te tarlang in, hei bakah hian Bairabi to Bilkhawthlir, National Highway 06 a hma an lak dan sawi in, Zero point to Bilkhawthlir inkar tender chhangtu contractor Tanor Engineering Pvt. Ltd te chu an hna thawk tura vawi tam tak an hrilh hriat tawh thu a sawi.

Kolasib khaw chhung kawng enkawltu Kolasib PWD Division EE Pu H. Lalfakzuala chuan, Kolasib khaw chhung kawng siamthatna tur sorkar atangin sum an la dawn loh thu sawiin, sum an hmuh veleh hna thawh nghal theih an beisei tih a sawi.

<><><>

MZP

Mizo Zirlai Pawl MZP hruaitute'n Inner Line Permit (ILP) dan siamthat tur chungchangah Home Minister hnenah rawtna an thlen.

MZP hruaitute chuan nimin khan Home Minister, Pu K. Sapdanga chu a Pisaah hmuin, Mizoram sawrkar in Inner Line Permit(ILP) dan an siamthat mekah rawtna an thlen a, rawtna an thlenah chuan hlawm paruk - administrative efficiency, traveller access, digitalization, enforcement, penalty, leh sponsor mawhphurhna bakah Centralised online ILP portal siam a ngaih thu sawiin, Aizawl atanga Sairang rel link tharah entry point lian, counter tam zawk, staff training tha zawk leh diltute tan online help desk siam a ngaih thu an thlen bawk a ni.

MZP chuan Online application hmanga system chu full digitalization, Aadhaar-linked verification, real-time tracking, leh permit dik leh dik loh enfiahna tur mobile apps hmanga siam bakah dan bawhchhiate mipui in an report theihna channel siam tura rawtna, ILP hmang diklo leh validity tawp tawh hnua cham hlen hremna tur bakah dan bawhchhia official-te pawn pawisa chawina hremna dan leh Sponsor tute pawh limit siam sak in, an mawhphurhna tur rawtna ah hian tarlan a ni.

Home Minister chuan, ILP dan an siamthatna tura rawtna hrang hrang MZP hruaitute'n a an thlen chu tha a ti hle a, an rawtna chu ngaih pawimawh a nih tur thu sawiin, MZP hruaitute chu tha taka thawhho puiah a sawm nghal a ni.

<><><>

SCHOOL EDUCATION MINISTER

School Education & ICT Minister, Dr. Vanlalthlanan nimin khan Vairengte ah Taxation Data Collection Centre leh School pali a tlawh.

Minister hian Vairengte a pan hma hian Kolasib-a Deputy Commissioner of State Tax, Kolasib Zone Office chu a tlawh hmasa a. Heta thawktute chu fuihin, theihtawp an chhuah tlan chuan Tax revenue tun aia tam an hmuh theih ngei a beisei thu a sawi. Taxation Office-a thawktute hian Minister hnenah hian Kolasib Zone a an hmalakna hrang hrangte lo hrilh in , Kolasib hnaih a Tax inspection point awm thei se an duh thu leh an mamawh dangte an thlen.

Kolasib atang hian Minister hian Vairengte pan nghalin, Govt. Vairengte PS-VII, Govt. Vairengte High School, St Henry School leh Govt. Vairengte Higher Secondary School te a tlawh a. Heng school a tlawhnaah hian thawktuten Minister hnenah hian an mamawh leh indaihlohna te an lo thlen nghal a ni.

School a tlawh zawhin, Vairengte a Taxation Data Collection Centre tlawh in Dr. Vanlalthlana chuan chhiah luh that tawk loh chhan zinga langsar

zual te a tarlang a, "Tax pumpelhna chi hrang hrang - Vairam atanga thil lei, Mizorama rawn hralh leh si , amaherawhchu vairam a tax pe si te, Mizorama thil hralh, Mizorama hralh ang ni lova ziah te leh tax pumpelhna kawng tam tak a awm thin a ni," a ti a. Hemi piah lamah hian, engtiangin nge tun aia chak zawk leh tam zawka tax collection tihpun a nih theih ang tih chu a ngaih pawimawh a nih thu a sawi bawk.

<><><>

HOUSE GUTTED @ VAIRENGTE

Nizan dar 8 bawr vel khan Vairengte IOC Veng a Pi Lallawmi In; Pu Lalhmachhuana te chhungkaw luah lai chu bungrua engmah chuh hman lovin a kang ral.

Thudawnna in a tarlan danin, Pu Lalhmachhuana te nupa hi chhungkaw thil pawimawh avangin Aizawl ah an zin a, In hi an fate pahnih in an nghak a, nimin tlai khan an unau hian eirawng an bawl a, eirawngbawl nan hian Gas hmang lovin tap ah thing an tuah a. Eirawng an bawl zawh hnu in mei ti mit lovin an len chhuahsan ni a hriat a ni. Kangmei a chhuah hnu hian an unau hian an lenna atanga koh haw an ni.

Kangmei chhuak hi a hmu hmasa ten theihtawp chhuah in thelh an tum a, CIJW School a sipai training lai te pawhin an pui a, hemi hnu hian Fire Department a thawktute an thlen hnuah kangmei hi an thelh mit thei a ni. He In kangah hian In luahtute bungrua engmah chuh hman ani lova, In kang hlut zawng hi cheng nuai 5 bawr vel anga chhut niin thudawnna chuan a tarlang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

DENLUNG

Denlung khuaah nimin khan Minister of State Pu B. Lalchhanzovan Lal Vandula leh Lalnu Ropuiliani Thlan a hawng a.

Thusawiin, tlawm ve lo Ropuiliani anga hnam dang laka tlawm ve lo tur chuan thangtharte chu thiamna lamah an intuai hriam a tul takzet a ni a ti. Minister chuan Ropuiliani chanchin tawi sawiin Mizo hnam tana a inpekna chu tangkam maia sawifiah theih a nih loh thu a sawi a. Lalnu Ropuiliani thlan hawn tak hian mitin thinlungah hnam tana inpekna tuh thar leh se a duh thu sawiin chumi atana pawimawh, rinawmna, huaisena leh mahni hnam tana din ngheh tlatna rilru pu theuhva, chu chu midang tih tura dah lova, mahni mawhphurhna theuhva dah turin kalkhawmte chu a chah a ni.

Bialtu MLA, Pu Jeje Lalpekhlua pawhin he hun hi a hmanpui a, Thlan hungna hi a vang feet 12 niin a dung feet 15 a ni a, Denlung branch YMA leh Denlung khawtlang mipuite sak niin Mizo mistiri vek hman ni a tarlan a ni a. A sakna tur hi Pu Lalthuama Sailo (Ropuiliani tuchhuan Thumna thawh niin cheng nuai 5 vel sen a ni.

<><><>

GST REFORMS

Goods & Services Tax GST dan thar hnuaia thil man a tlakhniam avangin mipui ten thil lei an phur a, an bungraw zawrh te pawh an hralh tha sawt niin sumdawng thenkhatin an sawi.

Akashvani Aizawl zawhna chhangin Zote Toyota sales manager Andrew Lalruatkima chuan September ni 22 atanga a taka GST dan thar hman hnuah Toyota motor man te chu a tlahniam vek tih sawiin, lirthei an neih zinga man tlahniam nasa ber chu Toyota Land Cruiser 300 niin, nuai 16, sang 6, 700 in a man a tlahniam a ti a, thil man tlahniam chu a hralhtu leh a leitute tan thil phurawm tak a ni tih sawiin, sorkar laipuiin GST a siamtha chu lawmawm a ti hle tih thu leh lirthei lei tum pawh an pun chhoh ngei a beisei thu sawi a ni.

Zote Toyota sales manager chuan kumtinin fur lai chu lirthei hralh chhuah a har lai ber a ni tih sawiin, tun thla kal mek, October thla atanga December thla inkar te chu sakhaw hrang hrang kutpui hunlai a nih angin lirthei hralh chhuah tam hunlai a ni tih a sawi bawk a ni.

<><><>

ZMC

Zoram Medical College & Hospital (ZMC&H) chuan thil siam chhuah midang lo entawn ve tumte khap bet thei tura dikna chanvo sawrkarin a siam chungchang inzirtirna, One-Day Sensitisation Programme on Intellectual Property Rights (IPR) an hmang.

ZMC&H Dean Prof. Swati M Patki chuan he hun hi kaihruaiin, Mizoram Science, Technology & Innovation Council (MISTIC) atanga mithiam, Pu Samuel Lalmalsawma, Principal Scientific Officer & Nodal Officer, Patent Information Centre leh Pu C. Laltlanzuala, Project Scientist-I, Patent Information Centre ten an zirtir a, ZMC&H leh a thawktute tana IPR pawimawhna leh tangkaina hrang hrang te an sawi a ni.

He programme ah hian ZMC&H a Faculty, Doctor, Project Scientist, Office Staff leh Intern-te an tel a ni.

<><><>

PM

Prime Minister Narendra Modia chuan nizan khan Gujarat-a Ekta nagar atangin hmasawwna hna cheng vaibelchhe 1140 chuang hu a hawng a. Nizana PM Modia hawn zingah hian Rajpipla-a Birsa Munda Tribal University leh Garudeshwar-a Hospitality District thawhkhatna te a tel a. Hei bakah hian hmasawwna ruhrel hrang hrang a tel bawk. Pu Modia hian Museum of Royal Kingdoms of India dinna tur lungphum a phum bawk a. He project ah hian cheng vaibelchhe 367 ruahman a ni a. Cheng vaibelchhe 30 chaung man e-bus 25 a vailiam bawk a ni..

<><><>

UNION HM

Union Home Minister Amit Shah-a chuan vawiinah Prime Minister Narendra Modia hovin Rashtirya Ekta Diwas,National Unity Day pualin Kevadiyah hun hman a ni dawn a ti. Pu Shaha chuan PM Modia hian Unity Parade a hawng dawn tih a sawi a. Pu Shaha chuan Unity Parade hi kumtin October ni 31 ah neih ziah tur anih thu a sawi a. Kumtina Republic Day Parade neih thin anga kalpui a ni ang a ti bawk. Hei bakah hian Pu Shaha chuan November ni 1 atanga November ni 15 thleng Bharat Parv hman a ni ang a ti bawk.

<><><>